

VENDIM
Nr. 97, datë 4.7.2017

**PËR MIRATIMIN E RREGULLORES PËR PROCEDURAT E LICENCIMIT,
MODIFIKIMIT, TRANSFERIMIT OSE HEQJEN E LICENCEVE NË SEKTORIN E
GAZIT NATYROR**

Në mbështetje të neneve 13 dhe 24 të ligjit nr. 102/2015, “Për sektorin e gazit natyror”, si dhe të nenit 26 të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.6.2016, bordi i Entit Rregullator të Energjisë (ERE), në mbledhjen e tij të datës 4.7.2017, pasi shqyrtoi relacionin e Drejtorive Teknike, mbi miratimin e Draftregullores për procedurat e licencimit, modifikimit, transferimit ose heqjen e licencave në sektorin e gazit natyror,

konstatoi se:

- ERE, me vendimin e bordit nr. 152, datë 30.9.2016, filloi procedurat “Për shqyrtimin dhe miratimin e “Draftregullores për procedurat e licencimit, modifikimit, transferimit ose heqjen e licencave në sektorin e gazit natyror”.

- ERE, me shkresën nr. 26/38 Prot., datë 4.10.2016, publikoi për 3 ditë me radhë në median e shkruar njoftimin për fillimin e procedurave “Për shqyrtimin dhe miratimin e draftregullores për procedurat e licencimit, modifikimit, transferimit ose heqjen e licencave në sektorin e gazit natyror”, duke filluar nga data 6 tetor 2016. Me anë të këtij njoftimi u ftuan të gjithë palët e interesuara për të shprehur opinionet dhe komentet e tyre brenda 15 ditëve.

- ERE, me shkresën nr. 715 Prot., në datën 7.10.2016, dërgoi “Draftregulloren për procedurat e licencimit, modifikimit, transferimit ose heqjen e licencave në sektorin e gazit natyror”, për marrje mendimi, pranë subjekteve: MEI, Autoritetit i Konkurrencës, Albpetrol dhe ISHTI.

- ISHTI, me shkresën nr. 9345/1 Prot., datë 13.10.2016, është shprehur se draftregullorja siguron një trajtim të barabartë dhe transparent për të gjitha subjektet që do të pajisen me licencë në përputhje me dispozitat e ligjit 102/2015 “Për sektorin e gazit natyror”, për të siguruar një treg konkurrues që garanton furnizim të qëndrueshëm dhe të sigurt, që kujdeset për mbrojtjen e mjedisit dhe aplikon procedura të njëjta për të gjithë të licencuarit.

- Autoriteti i Konkurrencës me shkresën nr. 337/1 Prot., datë 24.10.2016, është shprehur se “Draftregullorja për procedurat e licencimit, modifikimit, transferimit ose heqjen e licencave në sektorin e gazit natyror”, nuk bie në kundërshtim me ligjin nr. 9121, datë 28.7.2003, “Për mbrojtjen e konkurrencës”, të ndryshuar.

- Gjithashtu edhe ENC, me anë të komunikimit elektronik, ka përcjellë propozimet në lidhje me “Draftregulloren për procedurat e licencimit, modifikimit, transferimit ose heqjen e licencave në sektorin e gazit natyror”, të cilat, pasi janë shqyrtuar rast pas rasti, janë reflektuar në këtë draft.

Për gjithë sa më sipër, bordi i ERE-s

VENDOSI:

1. Të miratojë “Rregulloren për procedurat e licencimit, modifikimit, transferimit ose heqjen e licencave në sektorin e gazit natyror” (bashkëlidhur).

2. Drejtoria Juridike dhe Mbrojtjes së Konsumatorit të njoftojë palët e interesuara për vendimin e bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

Ky vendim mund të ankimohet në Gjykatën Administrative Tiranë brenda 45 ditëve kalendarike nga dita e publikimit në Fletoren Zyrtare.

KRYETARI
Petrit Ahmeti

RREGULLORJA

**PËR PROCEDURAT DHE AFATET PËR DHËNIEN, MODIFIKIMIN, TRANSFERIMIN OSE
HEQJEN E LICENCEVE NË SEKTORIN E GAZIT NATYROR**

KREU I
DISPOZITA TË PËRGJITHSHME

Neni 1 Autoriteti

Kjo rregullore është përgatitur në përputhje me nenin 16, pika 11, dhe nenin 24 të ligjit nr. 102/2015 “Për sektorin e gazit natyror”.

Neni 2 Qëllimi i rregullores

Kjo rregullore përcakton procedurat e licencimit për:

1. Kryerjen e aktiviteteve sikurse janë përcaktuar në ligjin nr. 102/2015 “Për sektorin e gazit natyror”, duke specifikuar termat dhe kushtet për dhënien, ndryshimin e një licence, si dhe autoritetin e ERE-s për përcaktimin e pagesave për t’u kryer për çdo lloj aplikimi për licencë.

2. Kushtet për dhënien, heqjen, modifikimin, transferimin e një licence në përputhje me nenin 27, 28 29 të ligjit nr. 102/2015 “Për sektorin e gazit natyror”.

Neni 3 Përkufizime

Përkufizimet e termave të përcaktuara në:

(i) ligjin “Për sektorin e gazit natyror” nr. 102/2015 “Për sektorin e gazit natyror”;

(ii) ligjin “Për sektorin e energjisë elektrike” nr. 43/2015 “Për sektorin e energjisë elektrike”;

(iii) rregullat e organizimit dhe funksionimit të ERE-s janë të përfshira në këtë dokument për të gjitha qëllimet. Në këto rregulla, termat e mëposhtëm do të kenë këto kuptime:

“Aplikues” do të thotë çdo person i cili aplikon për një procedim nga procedurat sipas kësaj rregulloreje.

“Aplikim” do të thotë depozitimi i dokumenteve për një nga procedurat e parashikuara në këtë rregullore, sikurse është shpjeguar në nenet 8 dhe 9 të kësaj rregulloreje.

“Bordi i ERE-s” ose “bordi” do të thotë organi vendimmarrës i ERE-s, që përbëhet nga pesë anëtarë të emëruar sipas procedurave të parashikuara nga ligji nr. 43/2015 “Për sektorin e energjisë elektrike” dhe ligji nr. 102/2015 “Për sektorin e gazit natyror”.

“ERE” do të thotë Enti Rregullator i Energjisë, që vepron në bazë të ligjit 43/2015 “Për sektorin e energjisë elektrike” dhe ligjit nr. 102/2015 “Për sektorin e gazit natyror”.

“Garanci e performancës” do të thotë një angazhim nga shoqëria mëmë e aplikantit ose të licencuarit për të siguruar përmbushjen në mënyrë të ndershme dhe të besueshme prej këtij aplikanti ose të licencuari të të gjithë termave dhe kushteve të licencës. Në rastet kur nuk ka shoqëri mëmë, atëherë çdo pronar që zotëron 5% ose më shumë të aksioneve ose të kapitalit të tij në këtë aplikim, ose licencë do të lëshojë një garanci performance të tillë.

“Garanci financiare” do të thotë një garanci nga një bankë ose persona të tjerë përgjegjës, të pranueshëm për ERE-n për të mbuluar dhe siguruar përmbushjen në mënyrë të ndershme dhe të besueshme të detyrimeve financiare të aplikantit ose të licencuarit, sikurse mundet të jetë rasti, sipas termave dhe kushteve e licencës.

“Gaz natyror” është gazi metan, përshirë gazin shoqërues, si dhe të gjitha hidrokarburet që janë në gjendje të gaztë në kushte atmosferike normale, i cili përfshin edhe GNL-në, biogazin ose lloje të tjera gazi që transmetohen dhe shpërndahen në sistemin e tubacioneve.

“Licencë” do të thotë një e drejtë e dhënë nga ERE për ushtrimin e një veprimtarie në përputhje me ligjin nr. 102/2015 “Për sektorin e gazit natyror”.

“I licencuar” do të thotë personi i pajisur me një licencë dhënë nga ERE për të kryer aktivitete në sektorin e gazit natyror në përputhje me dispozitat e ligjit 102/2015 “Për sektorin e gazit natyror”.

“OST” do të thotë Operator i Sistemit të Transmetimit të Gazit.

“OSSH” do të thotë Operator i Sistemit të Shpërndarjes së Gazit.

“Person” do të thotë çdo person juridik.

“Përfaqësues zyrtar” do të thotë personi i emëruar nga organet drejtuese të personit juridik, të autorizuar sipas legjislacionit shqiptar në fuqi, për të përfaqësuar aplikuesin ose të licencuarin për të gjithë qëllimet, sikurse është përcaktuar në këtë rregullore.

“Sistem” do të thotë çdo rrjet transmetimi, rrjet shpërndarjeje, impiant GNL ose hapësirë depozitimi, në pronësi ose përdorim/operim nga një i licencuar, përfshirë *linepack* së bashku me instalimet dhe funksionet e tij që sigurojnë shërbime ndihmëse, si dhe ato që janë të nevojshme për mundësimin e hyrjes në rrjetet e transmetimit, shpërndarjes dhe impiantet e GNL-së.

“Rregullore” do të thotë ky dokument i titulluar “Rregullat dhe kërkesat për dhënien, modifikimin,

transferimin dhe heqjen e licencave në sektorin e gazit natyror”.

“Tarifë aplikimi” është pagesa përkatëse, e vendosur nga bordi i ERE-s në përputhje me nenin 14 të ligjit nr. 102/2015 “Për sektorin e gazit natyror”, që çdo person ose i licencuar duhet kryejë ndaj ERE-s në përputhje me këtë rregullore për trajtimin e kërkesës së paraqitur për licencim, ndryshim, transferim licence.

Neni 4

Aktivitetet e licencuara

1. ERE mund të japë licence për veprimtaritë e përcaktuara nga ligji nr. 102/2015 “Për sektorin e gazit natyror” sikurse vijojnë:

- a) transmetim të gazit natyror;
- b) shpërndarje të gazit natyror;
- c) furnizim të gazit natyror (shitje me pakicë);
- ç) tregtim të gazit natyror (shitje me shumicë);
- d) operim të hapësirave të depozitimit të gazit natyror;
- dh) operim në impiantet e GNL-së;
- e) funksionimin e operatorit të tregut të gazit natyror.

2. Ushtrimi i çdo aktiviteti të sipërpërmendur kërkon licencë të veçantë.

3. Licencat do të lëshohen nga ERE në përputhje me këtë rregullore rast pas rasti dhe do të jenë të mbështetura në licencat model përkatëse të miratuara nga ERE.

Neni 5

Kohëzgjatja e vlefshmërisë së licencës

Kohëzgjatja e vlefshmërisë së një licence të lëshuar sipas kësaj rregulloreje për transmetim, shpërndarje, depozitim dhe GNL prej ERE në përputhje me nenin 4 të kësaj rregulloreje do të jetë për një periudhë prej 30 vitesh. Kohëzgjatja e vlefshmërisë së një licencë për furnizim dhe tregtim operimi në hapësirat e gazit natyror, funksionimin e operatorit të tregut të gazit natyror do të jetë për një periudhë prej 10 vitesh.

KREU II

PROCEDURAT E APLIKIMIT PËR LICENCË

Neni 6

E drejta për të aplikuar për licencë

Ka të drejtë të aplikojë për një licencë të lëshuar nga ERE çdo person që ka vendqëndrimin e tij në Shqipëri dhe me objekt të veprimtarisë aktivitetin e kërkuar për licencim. Çdo person i huaj duhet të krijojë një shoqëri tregtare sipas legjislacionit në fuqi me objekt veprimtarie aktivitetin e kërkuar për licencim nga ERE për të gjithë periudhën e vlefshmërisë së licencës.

Neni 7

Përfaqësuesi i aplikantit

1. Përfaqësuesi zyrtar do të përfaqësojë aplikantin përpara ERE-s për çdo çështje që ka të bëjë me aplikimin ose licencën që mundet të lëshohet.

2. Përfaqësuesi zyrtar do t'i paraqesë në ERE prokurën, vendimin e shoqërisë ose çdo dokument tjetër të nënshkruar ose miratuar nga aplikanti për caktimin e përfaqësuesit zyrtar si të autorizuarin e vet.

3. Përfaqësuesi zyrtar do t'i paraqesë ERE-s një vendim të shoqërisë ose çdo dokument tjetër të miratuar në mënyrë të rregullt nga aplikanti që autorizon këtë përfaqësues të depozitojë sipas rastit kërkesën për licencë ose modifikim, apo transferimin e saj.

4. Përfaqësuesi zyrtar duhet:

a) Të paraqesë aplikimin për licencë së bashku me dokumentacionin e kërkuar sipas neneve 8, 9 dhe 10 të kësaj rregulloreje.

b) Të paraqesë të dhëna dhe informacion shtesë të kërkuar nga ERE gjatë procesit të shqyrtimit të aplikimit për licencë.

c) Të përfaqësojë aplikantin në të gjitha çështjet që kanë të bëjnë me aplikimin.

d) Të përfaqësojë të licencuarin në të gjitha çështjet që kanë të bëjnë me çdo licencë të lëshuar në vijim të një aplikimi brenda kufijve të kompetencave të dhëna në autorizimin e depozituar në ERE.

5. Aplikanti ose i licencuari, kushdo qoftë, mundet të ndërrojë përfaqësuesin e tyre zyrtar duke paraqitur menjëherë një njoftim me shkrim pranë ERE-s për këtë ndryshim, të shoqëruar me prokurën ose autorizimin e organeve vendimmarrëse të shoqërisë për këtë qëllim.

Neni 8

Paraqitja e një aplikimi për licencë

1. Aplikimi konsiston në formatin e aplikimit dhe dokumentacionin e përcaktuar në nenin 9 të kësaj rregulloreje të plotësuar në mënyrë të rregullt nga aplikanti.
2. Aplikuesi do t'i paguajë ERE-s tarifën e aplikimit në fuqi në kohën kur aplikimi paraqitet.
3. Dokumentacioni i paraqitur nga aplikanti do të jetë origjinal dhe në gjuhën shqipe dhe nëse është kopjuar ose përkthyer prej origjinalit, atëherë dokumentet e kopjuara ose të përkthyer duhet të jenë të noterizuara.
4. Certifikatat dhe deklaratimet që mbështesin aplikimin duhet të jenë lëshuar jo më herët se 1 muaj prej datës së paraqitjes së aplikimit.
5. Aplikanti do të sigurojë që i gjithë dokumentacioni teknik i paraqitur së bashku me aplikimin e tij është përgatitur dhe nënshkruar nga ekspertë profesionistë të licencuar në fushën përkatëse. ERE mundet të kërkojë që këta ekspertë ta vërtetojnë ekspertizën e tyre.
6. Çdo Aplikim i shoqëruar nga dokumentacioni përkatës do të paraqitet në dy kopje:
 - a) Një kopje origjinale ose fotokopje e noterizuar sikurse përcaktuar në pikën 3 të këtij neni.
 - b) Një fotokopje e printuar dhe një në format elektronik e të gjithë dokumentacionit sikurse përcaktuar në këtë rregullore.

Neni 9

Format dhe dokumentacioni për aplikim

1. Forma e aplikimit (për t'u plotësuar nga aplikanti)
- Një Aplikim për një licencë do të përbëhet nga:

a) Tipi i Aplikimit

1	Lloji i aplikimit	☐ Licencim ☐ Transferim ☐ Ndryshim
2	Tipi i licencës	☐ Transmetim i gazit natyror ☐ Shpërndarje e gazit natyror ☐ Furnizim i gazit natyror (shitje me pakicë) Tregtim ☐ të gazit natyror (shitje me shumicë) Operim i ☐ hapësirave të depozitimit të gazit natyror Operim i ☐ impianteve të GNL-së

(Shënim: Vendosni X në kutinë përkatëse)

b. Informacion i përgjithshëm për aplikantin (për t'u plotësuar nga aplikanti)

1	Emri i aplikantit		
	Numri i regjistrimit në Qendrën Kombëtare të Regjistrimit të Biznesit		
2	Zyra Qendrore e Shoqërisë	Adresa	
		Celular	
		Tel/Fax	
		Email	
3	Përfaqësuesi zyrtar	Emri	
		Pozicioni	
		Adresa	
		Cel	
		Tel/Fax	
		Email	

c. Të dhëna mbi aplikantin (për t'u plotësuar nga aplikanti)

1	Unë, aplikanti, deklaroj se:	Po	Jo
	(a) Aplikantit nuk i është hequr asnjëherë ndonjë licencë e akorduar për gazin natyror ose	☐	☐
	(b) aplikantit nuk i është refuzuar asnjëherë ndonjë aplikim për licencë për gazin natyror, në Shqipëri ose vende të tjera	Po	JO
	Nëse përgjigja e ndonjërës prej pyetjeve (1.a) ose (1.b) është JO, atëherë aplikanti duhet të bashkëngjisë një shpjegim të plotë.	☐	☐

2	Unë, Përfaqësuesi zyrtar, deklaroj në emër të aplikantit se aplikanti është në dijeni të kuadrit ligjor dhe rregullator në fuqi në sektorin e gazit natyror dhe paraqes angazhimin e aplikantit për zbatimin korrekt të tyre.	Po ☐ Jo ☐
3	A është aplikanti i angazhuar në ndonjë aktivitet tjetër tregtar në Shqipëri ose vend tjetër? Nëse përgjigja e pyetjes 3 është PO, atëherë aplikanti duhet të bashkëngjisë shpjegime shtesë.	Po ☐ Jo ☐

d) Dokumentacioni ligjor, administrativ dhe pronësor:

i) Akti i regjistrimit në Qendrën Kombëtare të Regjistrimit të Biznesit dhe statuti e akti i themelimit shoqërisë tregtare.

ii) Vërtetim nga organet kompetente që ndaj personit juridik apo personave dhe drejtuesve kryesorë të shoqërisë tregtare nuk ka një vendim të formës së prerë për ndonjë vepër penale.

iii) Në rastin e subjekteve me nënshtetësi të huaj duhet të vërtetohet rezidenca shqiptare e përfaqësuesit të shoqërisë dhe dëshmi penaliteti.

iv) Struktura organizative dhe funksionimi administrativ i shoqërisë. Lista e personelit sipas profilit (në përputhje me aktivitetin për të cilin është kërkuar licenca).

v) Me përjashtim të aplikimit për licencë të furnizimit (neni 4.1.c) dhe tregtimit (neni 4.1.ç), dhe operimit të tregut marrëveshja dhe leja e miratuar nga Këshilli i Ministrave. Identiteti i të gjithë personave që kanë interes pronësor tek aplikanti më të madh dhe të barabartë me 5%.

vi) Dokumentacioni që tregon titujt ose pronësinë mbi asetet që ka, që ka dedikuar ose ka nënkontraktuar/marrë me qira ose që pritet në mënyrë bindëse të përfitohen nga ose për aplikantin për të kryer funksionet ose plotësuar detyrimet nën licencën e kërkuar. Lejet dhe autorizimet mjedisore sipas rastit për aktivitetet, ushtrimi i të cilave kryhet me asetet përkatëse.

e) Dokumentacioni dhe garancitë financiare dhe fiskale.

i) Deklarime të lëshuara prej autoriteteve përkatëse për shlyerjen e detyrimeve fiskale dhe sigurimeve shoqërore, në masën që këto detyrime janë plotësuar prej aplikantit.

ii) Bilancet financiare të audituara nga një shoqëri audituese e akredituar, për secilin prej tre viteve të fundit që paraprijnë paraqitjen e aplikimit.

iii) Garancinë e përshtatshme financiare [e paaplikueshme për rastin e furnizimit (neni 4.1/“c”) dhe tregtimit (neni 4.1/“ç”)] dhe garancinë e performancës që sigurojnë aftësinë e aplikantit për të përmbushur të gjitha detyrimet e tij nën licencën e kërkuar, duke përfshirë, por pa u kufizuar; largimin përfundimtar të plotë ose të pjesshëm të pajisjeve dhe/ose infrastrukturës dhe rehabilitimin e mjedisit, si dhe mbështetjen menaxheriale, operacionale dhe financiare prej pronarëve të aplikantit.

iv) Me përjashtim të rastit të furnizimit (neni 4.1.c) dhe rastit të tregtimit (neni 4.1.ç), një certifikate sigurimi nga shoqëri sigurimi (që operojnë në përputhje me legjislacionin në fuqi në Shqipëri) që evidenton mbulimin e përgjegjësisë për dëmtimet për plagosje, sëmundje ose raste të vdekjes së personave, ose për humbjen, ose shkatërrimin e pronës të shkaktuara ose që kanë rezultuar prej aktiviteteve të aplikantit në kuadër të licencës së kërkuar në një nivel përgjegjësie jo më të vogël se 10 milionë USD. Kjo politikë ose këto politika sigurie do të jenë dhe qëndrojnë në fuqi dhe me efekt të plotë për të gjithë kohëzgjatjen e licencës së kërkuar. Për më tepër, i licencuari do të mbetet përgjegjës për çdo dëmtim që do të mund të ndodhë prej, ose të lidhet me, ose të rezultojë prej aktiviteteve të kryera gjatë kohëzgjatjes së licencës.

v) Vërtetimin e kryerjes së pagesës ndaj ERE-s të tarifës së aplikimit në fuqi në momentin e paraqitjes së aplikimit.

vi) Një plan biznesi, i cili përfshin një analizë të kostove dhe përfitimeve, përfshirë kostot për

largimin përfundimtar të pajisjeve dhe rehabilitimin e mjedisit me përfundimin e operacioneve.

vii) Nëse aplikanti ka synim të përdorë një shoqëri menaxhimi për operacionet e tij ditore, ai duhet të informojë ERE-n për këtë synim dhe të japë një garanci të performancës për kryerjen me ndershmëri dhe besueshmëri të veprimeve prej kësaj shoqërie menaxhimi.

2. Dokumente specifike për llojin e licencës.

Në varësi të tipit të licencës, aplikanti do të paraqesë në ERE dokumentet që vijojnë:

a. Licenca për transmetimin e gazit natyror;

a.1 Subjekti që aplikon për një licencë në transmetimin e gazit natyror, duhet që më parë të certifikohet sipas procedurës së përcaktuar në nenin 37 të ligjit 102/2015 “Për sektorin e gazit natyror”.

a.2 Informacion me të dhëna të përgjithshme dhe teknike të projektit që përfshijnë sa vijon:

i) Vendndodhjen e instalimeve dhe gjurmën e tubacioneve përfshirë hartën topografike për territorin ku do të ushtrojë aktivitetin.

ii) Kapacitetin maksimal teknik të kontraktuar dhe të disponueshëm në të gjitha pikat e hyrjes (*in take*) në sistem dhe të daljes (*off take*) prej sistemit dhe ndërlidhjet e tij me rrjete të tjera të transmetimit dhe shpërndarjes, impiantet e magazinimit, prodhimit dhe terminalët e GNL-së.

iii) Volumet e projektuara ditore për t’u përpunuar sipas vlerësimeve të aplikantit.

iv) Standardet teknike, presionet maksimale të projektuara, kërkesat e komprimimit dhe karakteristikat e tjera teknike të makinerive dhe pajisjeve teknike që do të instalohen.

v) Presionet e punës të projektuara mbështetur në vlerësimet e aplikantit.

vi) Kategoritë dhe lista e konsumatorëve, si dhe livrimet e parashikuara.

vii) Vendndodhjet e matësve dhe specifikimet.

viii) Vendndodhjet e kontrollit të cilësisë së gazit.

ix) Dëshmi të kontratave/angazhimeve për transportin e gazit.

x) Kërkesat e pritshme për hyrje prej palëve të treta ose çdo kërkesë e pritshme për përjashtim nga e drejta për hyrje e palëve të treta, sikurse çdo vendim i dhënë më parë për përjashtim prej detyrimit të dhënies së të drejtës së hyrjes për infrastrukturën e reja sipas ligjit nr. 102/2015 “Për sektorin e gazit natyror”.

xi) Lidhjet ndërkufitare dhe parametrat e operimit në vendet fqinje.

xii) Marrëveshjet operationale të balancimit.

xiii) Burimi i synuar dhe procedura e prokurimit të gazit natyror të nevojshëm për balancimin e sistemit të transmetimit.

xiv) Aftësia për lëvizjen në kah të kundërt.

xv) Punët e aplikantit për (a) zgjidhjen teknike të propozuar (b) vlerësimin e ndikimit mjedisor (c) vlerësimin e kostos (d) parashikimet ekonomike, duke përfshirë mënyrat e financimit të cilat justifikojnë planin e biznesit për projektin e transmetimit të gazit natyror, të përgatitura nga një shoqëri e specializuar inxhinierike.

xvi) Programin e punës për zbatimin e projektit dhe jeta e pritshme e projektit.

xvii) Planet vjetore të investimit për përmirësimin, zgjerimin ose modifikime të tjera të sistemit të transmetimit për një periudhë jo më pak se 5 vjet prej datës efektive të licencës në përputhje me legjislacionin në fuqi.

xviii) Programi i parashikuar i mirëmbajtjes së sistemit të transmetimit.

b) Licenca për shpërndarjen e gazit natyror:

Informacion me të dhëna të përgjithshme dhe teknike të projektit që përfshijnë sa vijon:

i) Vendndodhjen e instalimeve dhe gjurmën e tubacioneve përfshirë hartën topografike.

ii) Zonën gjeografike të mbuluar nga aplikimi.

iii) Kapacitetin maksimal teknik të kontraktuar dhe të disponueshëm në të gjitha pikat e hyrjes (*in take*) në sistem dhe të daljes (*off take*) prej sistemit dhe ndërlidhjet e tij me rrjetet e tjera të transmetimit dhe

shpërndarjes, impiantet e magazinimit, prodhimet dhe terminalët e GNL-së.

iv) Volumet e projektuara ditore për t'u përpunuar sipas vlerësimeve të aplikantit.

v) Standardet teknike, presionet maksimale të projektuara, kërkesat e komprimimit dhe karakteristikat e tjera teknike të makinerive dhe pajisjeve teknike që do të instalohen.

vi) Presionet e punës të projektuara mbështetur në vlerësimet e aplikantit.

vii) Kategoritë e konsumatorëve dhe livrimet e projektuara.

viii) Vendndodhjet e matësve dhe specifikimet.

ix) Planet e aromatizimit përfshirë vendndodhjet.

x) Dëshmi të kontratave/angazhimeve.

xi) Kërkesat e pritshme për hyrje prej palëve të treta ose çdo kërkesë e pritshme për përjashtim nga e drejta për hyrjen e palëve të treta, sikurse çdo vendim i dhënë më parë për përjashtim prej detyrimit të dhënies së të drejtës së hyrjes për infrastrukturën e reja sipas ligjit nr. 102/2015 "Për sektorin e gazit natyror".

xii) Lidhjet ndërrajonale dhe parametrat e operimit të OSSH-së fqinje nëse është e përshtatshme.

xiii) Aftësia për lëvizjen në kah të kundërt nëse është e përshtatshme.

xiv) Punët e aplikantit për (a) zgjidhjen teknike të propozuar (b) vlerësimin e ndikimit mjedisor (c) vlerësimin e kostos (d) parashikimet ekonomike, duke përfshirë mënyrat e financimit të cilat justifikojnë planin e biznesit për projektin e shpërndarjes të gazit natyror, të përgatitura nga një firmë e specializuar inxhinierike.

xv) Programin e punës për zbatimin e projektit dhe jeta e pritshme e projektit.

xvi) Planet vjetore të investimit për përmirësimin, zgjerimin ose modifikime të tjera të sistemit të shpërndarjes për një periudhë jo më pak se 5 vjet prej datës efektive të licencës në përputhje me legjisllacionin në fuqi.

xvii) Programi i parashikuar i mirëmbajtjes së sistemit të shpërndarjes.

xviii) Sasia mesatare e gazit natyror që parashikohet për t'u shpërndarë gjatë një viti mbështetur në një program tipik mujor.

c) Licenca për operimin e impianteve të Gazit Natyror të Lëngëzuar (GNL):

Informacion me të dhëna të përgjithshme dhe teknike të projektit që përfshijnë sa vijon:

i) Tipi i impiantit të rigazifikimit.

ii) Hartat dhe vizatimet që tregojnë vendndodhjen e instalimeve në tokë dhe në det dhe pikën(at) e lidhjes me tubacionet tokësore të transmetimit, përfshirë hapësirat e magazinimit që lidhen me operacionet e GNL-së.

iii) Kapacitetin maksimal teknik, të kontraktuar dhe të disponueshëm në pikën e marrjes (*off take*) prej/për në terminal.

iv) Volumet e projektuara ditore për t'u përpunuar sipas vlerësimeve të aplikantit.

v) Standardet teknike, presionet maksimale të projektuara, kërkesat e komprimimit dhe matjes dhe karakteristikat e tjera teknike të makinerive dhe pajisjeve teknike që do të instalohen.

vi) Presionet e punës të projektuara mbështetur në vlerësimet e aplikantit.

vii) Programet e synuara të furnizimit dhe madhësia e anijeve cisternë të GNL-së.

viii) Madhësia e rezervuarëve të depozitimit.

ix) Burimet e furnizimit.

x) Kategoritë dhe lista e konsumatorëve të pritshëm, si dhe livrimet e projektuara.

xi) Kërkesat e pritshme për hyrje prej palëve të treta ose çdo kërkesë e pritshme për përjashtim nga e drejta për hyrje e palëve të treta, sikurse çdo vendim i dhënë më parë për përjashtim prej detyrimit të dhënies së të drejtës së hyrjes për infrastrukturën e reja sipas ligjit nr. 102/2015 "Për sektorin e gazit natyror".

xii) Punët e aplikantit për (a) zgjidhjen teknike të propozuar (b) vlerësimin e ndikimit mjedisor (c)

vlerësimin e kostos (d) parashikimet ekonomike, duke përfshirë mënyrat financimit, të cilat justifikojnë planin e biznesit për projektin e GNL-së, të përgatitura nga një shoqëri e specializuar dhe e licencuar për këto shërbime.

xiii) Programin e punës për zbatimin e projektit dhe jetëgjatësia e pritshme e projektit.

xiv) Planet vjetore të investimit për përmirësimin, zgjerimin ose modifikime të tjera të impiantit të GNL-së për një periudhë jo më pak se 5 vjet prej datës efektive të licencës në përputhje me legjislacionin në fuqi.

xv) Programi i parashikuar i mirëmbajtjes së impiantit të GNL-së.

d) Licenca për operimin e hapësirave të depozitimit të gazit natyror:

Informacion me të dhëna të përgjithshme dhe teknike të projektit që përfshijnë sa vijon:

i) Vendndodhjen gjeografike të hapësirës së depozitimit nëntokësor dhe gjurmën e tubacioneve përfshirë një hartë topografike.

ii) Përshkrim të kushteve gjeologjike të hapësirës depozituese nëntokësore.

iii) Volumi maksimal i depozitueshëm dhe gazi i vet i nevojshëm.

iv) Kërkesat minimale të cilësisë që duhet të plotësojë gazi që do të magazinohet.

v) Profili i debiteve të rilëvrimit të gazit natyror.

vi) Presioni maksimal i rezervuarit nëntokësor.

vii) Numri i puseve dhe debitet maksimale të tyre të injektimit dhe të prodhimit.

viii) Standardet teknike, presionet maksimale të projektuara, kërkesat e komprimimit dhe matjes dhe karakteristikat e tjera teknike të makinerive dhe pajisjeve teknike që do të instalohen.

ix) Kërkesat minimale të cilësisë së gazit që do të livrohet sërish dhe instalimet që sigurojnë që cilësia e përcaktuar është arritur.

x) Dëshmi të kontratave/angazhimeve për depozitim.

xi) Kategoritë dhe listën e konsumatorëve (Projekti).

xii) Kërkesat e pritshme për hyrje prej palëve të treta ose çdo kërkesë e pritshme për përjashtim nga e drejta për hyrje e palëve të treta, sikurse çdo vendim i dhënë më parë për përjashtim prej detyrimit të dhënies së të drejtës së hyrjes për infrastrukturën e reja sipas ligjit nr. 102/ 2015 “Për sektorin e gazit natyror”

xiii) Punët e aplikantit për (a) zgjidhjen teknike të propozuar (b) vlerësimin e ndikimit mjedisor (c) vlerësimin e kostos (d) parashikimet ekonomike, duke përfshirë mënyrat e financimit të cilat justifikojnë planin e biznesit për projektin e depozitimit nëntokësor të gazit natyror, të përgatitura nga një shoqëri e specializuar.

xiv) Programin e punës për zbatimin e projektit dhe jetëgjatësia e pritshme e projektit.

xv) Planet vjetore të investimit për përmirësimin, zgjerimin ose modifikime të tjera të hapësirave të depozitimit do të hartohen sipas nenit 56, pika 2 të ligjit 102/2015 “Për sektorin e gazit natyror”.

xvi) Programi i parashikuar i mirëmbajtjes së hapësirave të depozitimit.

e) Licenca për tregtim të gazit natyror:

Duhet të përmbajë informacion të përgjithshëm që përfshin sa vijon:

i) Sasinë mesatare të gazit natyror të shprehur në milion Nm³, e parashikuar për t'u livruar gjatë një viti.

ii) Garancinë që cilësia e gazit përmbush kriteret minimale të operatorit të Sistemit.

iii) Kapitalin financiar të nevojshëm për kryerjen e aktivitetit që kërkohet prej Licensës dhe në veçanti për të mbuluar ekspozimin financiar të shkaktuar prej balancimit të gazit.

iv) f. Licensë për Furnizim me Gaz Natyror

Duhet të përmbajë informacion të përgjithshëm që përfshin sa vijon:

i) Sasinë mesatare të gazit natyror të shprehur në milion Nm³, e parashikuar për t'u livruar gjatë një viti.

ii) Garancinë që cilësia e furnizimit me gaz përmbush kriteret minimale të operatorit të sistemit.

iii) Kapitalin financiar të nevojshëm për kryerjen e aktivitetit që kërkohet prej licencës dhe në veçanti për të mbuluar ekspozimin financiar të shkaktuar prej balancimit të gazit.

Licencë për operimin e tregut:

- a) Lista e të punësuarve, profesioni, formimi.
- b) Dëshmi për posedimin e *hardware*-it dhe *software*-it të nevojshëm për komunikimin me të gjitha pikat e matjes, si dhe me të gjithë pjesëmarrësit në treg (klientët e tyre).
- c) Lista e anëtarëve të këshillit mbikëqyrës.

Neni 10

Vlerësimi i dokumentacionit të aplikimit për licencë

1. Pasi shqyrton aplikimin e paraqitur, lidhur me plotësimin e kërkesave të nenit 8 dhe 9, personi i ngarkuar nga drejtoria përgjegjëse përgatit një relacion, ku i propozon bordit të ERE-s fillimin ose jo të procedurave për shqyrtimin e aplikimit në përputhje me afatet e përcaktuara në rregullat për organizimin, funksionimin dhe procedurat e ERE-s dhe në këtë rregullore.

2. Çdo aplikim do të paraqitet në përputhje me formën, përmbajtjen, afatet dhe përcaktimet e kësaj rregullore, duke plotësuar kërkesat dhe dokumentet e kërkuara në të. Në të kundërt, bordit të ERE-s i propozohet mosfillimi i procedurave të shqyrtimit të aplikimit.

3. Bordi i ERE-s mund të vendos për fillimin ose jo të procedurave për shqyrtimin e aplikimit bazuar në legjislacionin në fuqi dhe në relacionin e sipërpërmendur.

4. ERE mund të fillojë procedurat për shqyrtimin e një aplikimi edhe në rastet e përshkruara në pikën 4 të nenit 8 të kësaj rregullore, por vendimi përfundimtar për refuzimin ose licencimin do të merret vetëm pasi të jenë paraqitur lejet përkatëse nga institucionet e tjera.

5. Në rast refuzimi, ERE do të njoftojë aplikuesin lidhur me arsyet e refuzimit dhe duke i dhënë udhëzimet e nevojshme brenda 7 ditë pune nga marrja e vendimit.

6. Aplikuesi mund të paraqesë një aplikim të ri sipas kërkesave të kësaj rregullore dhe duke marrë në konsideratë udhëzimet e ERE-s.

7. Nëse aplikuesi paraqet aplikimin e ri në përputhje me pikën 6 të këtij neni brenda 1 muaji nga marrja e vendimit për mosfillimin e procedurave për shqyrtimin e aplikimit, dokumentacioni i paraqitur për aplikimin e mëparshëm dhe pagesa e kryer për këtë procedurë do të konsiderohet i vlefshëm për aplikimin e ri.

8. Në rast të miratimit të fillimit të procedurave për shqyrtimin e aplikimit, brenda 2 ditëve pune nga marrja e vendimit, ERE publikon në median e shkruar për dy ditë me radhë një njoftimin për aplikimin e paraqitur në tri gazeta të përditshme me shpërndarje në të gjithë vendin që botohen në Tiranë.

9. Njoftimi përmban një informacion të shkurtër për aplikimin e paraqitur; një njoftim që paraqitja e objeksioneve ose ankesave nga personat e interesuar mund të bëhen në ERE brenda afateve të përcaktuara nga kjo rregullore.

10. Pas publikimit në media të njoftimit, ERE do të sigurojë që për një periudhë 30 ditë pune nga data e parë e publikimit të njoftimit për aplikimet për licencim në aktivitetin e prodhimit, aplikimi dhe të gjitha dokumentet shoqëruese apo çdo informacion tjetër që janë të disponueshme për inspektimin e publikut në zyrat e saj.

11. Me vendim të bordit të ERE-s, duke marrë parasysh pretendimet e aplikuesit, mund të vendoset që informacione ose dokumente që mund të shkaktojnë dëm tregtar ndaj aplikuesit, të mbahen konfidenciale dhe mund të ndalojë inspektimin e tyre nga ana e palëve të treta.

12. Në çdo rast, ERE njofton aplikuesin për objeksionet e paraqitura ndaj aplikimit për të cilin kanë filluar procedurat e licencimit dhe kërkon sqarime nga aplikuesi për objeksionet e paraqitura nga palët e interesuara.

Neni 11

Vendimarrja e bordit të ERE-s

1. Me plotësimin e afatit të paraqitjes së kundërshtimeve dhe ankesave, bordi i ERE-s do të vlerësojë aplikimin mbështetur në kriteret e parashikuara prej ligjit nr. 102/2015 “Për sektorin e gazit natyror”. Në marrjen e vendimit për të miratuar apo refuzuar një aplikim për licencë sikurse për termat dhe kushtet e kësaj licence, bordi i ERE do të marrë në konsideratë dhe mbështesë vendimin e vet në kriteret që vijojnë:

a) Aplikimin dhe plotësinë e saktësinë e informacionit dhe dokumentacionit të paraqitur në përputhje me këtë rregullore dhe me kërkesat për informacion shtesë, nëse ka pasur të tilla nga ana e ERE-s. b)

Relacionin e drejtorisë përkatëse të ERE-s, të përgatitur në përputhje me pikën 11 të nenit 10.

c) Kundërshtimet dhe ankesat që kanë lidhje me çështjen, nëse ka të tilla, të paraqitura nga palët e interesuara ose prej publikut të gjerë në lidhje me aplikimin në proces vlerësimi.

d) Në rastin e aplikimeve për licenca për transmetim dhe shpërndarje, ekzistencën e licencave ende të vlefshme të lëshuara më parë për të njëjtat aktivitete në vendndodhjen dhe territorin në të cilin aktiviteti i propozuar synon të kryhet.

e) Funksionimin e sigurt dhe të qëndrueshëm të pajisjeve, impianteve dhe/ose rrjeteve (nuk zbatohet për rastet e furnizimit (neni 4.1.c) dhe tregtimit (neni 4.1.ç) të kësaj rregulloreje).

f) Kërkesën për burime të gazit natyror.

g) Kërkesat për sigurinë kombëtare, jetën e banoreve, pronat, shëndetin dhe rendin publik (nuk zbatohet për rastet e furnizimit (neni 4.1.c) dhe tregtimit (neni 4.1.ç) të kësaj rregulloreje).

h) Angazhimet financiare të ndërmarra dhe garancitë e ofruara prej aplikantit.

i) Mbrojtjen e mjedisit (nuk zbatohet për rastet e furnizimit (neni 4.1.c) dhe tregtimit (neni 4.1.ç) të kësaj rregulloreje).

j) Promovimin e përdorimit eficient të energjisë në sektorin e gazit natyror.

k) Detyrimet e shërbimit publik të pritshme prej aplikantit, sikurse përcaktuar nga legjislacioni shqiptar e në veçanti ligji nr. 102/ 2015 “Për sektorin e gazit natyror”.

l) Promovimin e një tregu konkurrues të gazit natyror dhe, të paktën në rastin e furnizimit të konsumatorëve tariforë, principin e kostos më të ulët për furnizim me gaz natyror.

m) Sigurinë dhe besueshmërinë e furnizimit me gaz natyror dhe aftësinë për rrjedhje në kah të kundërt të këtij furnizimi brenda Republikës së Shqipërisë.

2. Në përputhje me Rregullat e saj të organizimit dhe funksionimit, ERE do të njoftojë me shkrim të gjithë palët e interesuara për vendimin e bordit brenda 3 ditësh pune prej marrjes së këtij vendimi.

Neni 12

Dhënia ose refuzimi i licencës

1. Bordi i ERE-s do ta marrë vendimin përfundimtar për dhënien ose refuzimin e licencës brenda 90 ditëve nga dita e parë e publikimit të njoftimit në media, duke e mbështetur vendimin e tij në bazë të kriterëve të parashtruar në nenin 11 të kësaj rregulloreje.

2. Vendimi përfundimtar i bordit do të jetë me shkrim dhe do të përmbajë arsyet për dhënien ose refuzimin e licencës.

3. Vendimi i ERE-s për miratimin ose refuzimin e dhënies së një licence sipas kësaj rregulloreje do të publikohet në Fletoren Zyrtare.

4. Vendimi i ERE-s mundet të apelohej në përputhje me parashikimet e ligjit nr.102/2015 “Për sektorin e gazit natyror”.

5. Në rastet kur ERE nuk pranon të zgjasë vlefshmërinë një licence, zbatohen kushtet e nenit 16 të kësaj rregulloreje.

KREU III NDRYSHIMI DHE TRANSFERIMI I LICENCEVE

Neni 13

Procedurat e ndryshimit të licenceve

1. ERE mundet që, me kërkesën e të licencuarit, me iniciativën e vet ose bazuar në një vendim gjykatë të formës së prerë, të ndryshojë termat dhe kushtet e një licence që ajo konsideron të përshtatshme, në përputhje me procedurat e përcaktuara nga ligji nr. 102/2015 “Për sektorin e gazit natyror”, mund të vendosë të ndryshojë një licencë në rastet që vijnë:

a) kur ka ndryshime të disa rrethanave (siç mundet të jenë kuadri ligjor, vendime të gjykatës) që kanë ndodhur ndërmjet datës së lëshimit të licencës dhe datës së kërkesës për ndryshim, ose

b) kur ka ngjarje që sjellin efekte të konsiderueshme në sistemet e transmetimit dhe shpërndarjes ose në tregun e gazit natyror, ose

c) kur ka ndryshime ligjore, teknike ose financiare që e bëjnë të pamundur plotësimin e pjeshëm ose të plotë të termave dhe kushteve të parashikuara në licencë.

3. Nëse ERE vendos të ndryshojë licencën, ajo do t'i lëshojë të licencuarit një licencë të amenduar me ndryshimet e bëra, duke anuluar në këtë mënyrë pjesët e licencës që nuk janë më të vlefshme. Nëse i licencuari kundërshton termat dhe kushtet e licencës së ndryshuar, atëherë do të zbatohen kushtet e nenit 16 të kësaj rregulloreje.

4. Në rastin e një kërkeje nga i licencuari për një ndryshim të licencës së vet, ERE do të zbatojë të njëjtat afate dhe procedura si në rastin e licencimit sikurse përcaktohet nga kjo rregullore. Kjo kërkesë për ndryshim do të përfshijë:

a) Tekstin e propozuar të ndryshimit specifik që është kërkuar.

b) Informacion me shkrim që shpjegon arsyet e kërkesës për ndryshim të licencës.

c) Vendimin e shoqërisë ose çdo dokument tjetër që vërteton kërkesën e të licencuarit për ndryshimin specifik të licencës.

5. Përpara miratimit të modifikimit të një licence, ERE publikon modifikimet e propozuara dhe shqyrton vërejtjet ose ankesat e mundshme, të paraqitura nga palët e interesuara lidhur me këtë modifikim.

Neni 15

Transferimi i pjeshëm ose i plotë i licencës të licencuarit

1. Me kërkesën e të licencuarit, ERE mundet të transferojë licencën pjesërisht ose plotësisht tek një person tjetër në përputhje me ligjin nr. 102/2015. Në rast të transferimit të plotë ose të pjeshëm të pronësisë së aseteve, personi tek i cili do të transferohen asetet, do të aplikojë tek ERE për një licencë të re për aktivitetet që do të transferohen, duke paraqitur dokumentacionin që vijon:

a) Formën e Aplikimit sikurse përcaktuar në pikat 1(a), 1(b) dhe 1(c) të nenit 9.

b) Dokumentacionin ligjor, administrativ dhe pronësor, sikurse përcaktuar në pikën 1(d) të nenit 9.

c) Dokumentacionin dhe garancitë financiare dhe fiskale, sikurse përcaktuar në pikën 1 (e) të nenit 9.

d) Çdo propozim për ndryshim ose zëvendësim në dokumentacionin teknik.

e) Një deklaratë me faktet e plota që kanë të bëjnë me nevojën ose arsyet për transferimin e propozuar.

f) Transferimi do të bëhet sipas kushteve të “Rregullores së procedurave për kalimin e aseteve të të licencuarve”.

3. Me marrjen e vendimit prej ERE-s për fillimin e procedurave për vlerësimin e aplikimit për transferimin e plotë ose të pjeshëm të licencës, ERE do të publikojë aplikimin në përputhje me pikën 5

të nenit 10 të kësaj rregulloreje. Kushtet e pikës 6 të nenit 10 do të zbatohen për të gjitha aplikimet për transferim licence.

4. ERE do të marrë një vendim për miratimin ose refuzimin e aplikimit për transferimin e plotë ose të pjesshëm të licencës brenda 90 ditëve kalendarike prej ditës së fillimit të procedurave për vlerësimin e aplikimit dhe gjatë kësaj periudhe mbajtësi aktual i licencës do të vazhdojë të kryejë shërbimet në përputhje me detyrimet e licencës në fuqi.

5. I propozuari për aplikant për licencë duhet të:

a) ketë aftësitë dhe eksperiencën teknike dhe financiare për të marrë përsipër detyrimet që i takojnë të licencuarit nën këtë licencë;

b) pranojë dhe marrë përsipër të gjithë termat dhe kushtet e licencës përfshirë dhënien e një garancie financiare dhe të një garancie të performancës dhe

c) të jetë i regjistruar dhe në përputhje me të gjitha detyrimet ligjore për të bërë biznes në Shqipëri.

6. Në përputhje me legjislacionin në fuqi, çdo transferim i tillë do të jetë i kushtëzuar nga miratimi paraprak me shkrim i ERE-s, i cili nuk do të refuzohet apo vonohet në mënyrë të paarsyeshme.

7. Njoftimi për një transferim të synuar, përshkruar në pikën 2 të këtij neni, do të shoqërohet të paktën nga sa vijon:

a) Një kopje e dokumentit ligjor të propozuar ose evidencë tjetër dokumentare e transferimit të synuar.

b) Dokumente që kanë lidhje me aplikantin për licencë të propozuar, të cilat do të përfshijnë:

i) Bilancet financiare të audituara dhe të dhëna të tjera për të siguruar bindjen e arsyeshme të ERE-s për plotësimin e kërkesave të përcaktuara në nenin 9 të kësaj rregulloreje.

ii) Të dhëna për identitetin e pronarëve të aplikantit për licencë të propozuar, duke pasur parasysh që për rastin e një shoqërie, aksionet e së cilës janë regjistruar në një bursë të mirënjohur, këto të dhëna do të kërkojnë për pronarët kryesorë (sikurse përcaktuar ose përdorur prej ligjeve ose rregullave në fuqi, në bazë të të cilave këto shoqëri kanë regjistruar aksionet e tyre).

iii) Të dhëna për shoqëritë mëma direkte dhe indirekte, përfshirë identitetin e pronarëve të shoqërisë mëmë finale të aplikantit për licencë të propozuar.

iv) Çdo dokument ose informacion tjetër shtesë që ERE në mënyrë të arsyeshme mund ta gjykojë të nevojshëm për të marrë një vendim për miratimin e transferimit të propozuar.

8. Brenda 90 ditëve kalendarike pas marrjes prej ERE-s të të gjithë dokumentacionit të kërkuar dhe të dhënave të tjera, ERE do të nxjerrë vendimin e vet për miratimin ose refuzimin e transferimit të propozuar. Publikimi dhe marrja e komenteve të publikut do të bëhet sipas dispozitave të nenit 10.

Neni 16

Heqja e licencave

Me iniciativë të ERE-s, personave të interesuar apo mbajtësit të licencës, ERE fillon procedurën për heqjen e licencës në zbatim të parashikimeve të rregullores për procedurat e heqjes së një licence.

KREU V

LËSHIMI DHE RREGJISTRIMI I LICENCE

Neni 17

Regjistri i licencave

1. Mbas marrjes së vendimit nga ERE për licencimin, transferimin e pjesshëm/të plotë ose ndryshimin e licencës, Licenca përkatëse i lëshohet aplikantit.

2. Një kopje e çdo licence të lëshuar për kryerjen e aktiviteteve në sektorin e gazit natyror mbahet nga ERE dhe regjistrohet në regjistrin e licencave.

3. Regjistri i licencave do të mbahet me shkrim nga sekretaria e bordit, sikurse edhe në formë

elektronike. Ai do të publikohet gjithashtu në faqen e internetit të ERE-s dhe do të rifreskohet rregullisht.

4. Në Regjistrë mbahen informacionet që vijnë:

- a) numri i regjistrimit të licencës dhe kategoria;
- b) data e miratimit të licencës;
- c) data e lëshimit të licencës;
- d) emri i të licencuarit;
- e) nënshkrimi i përfaqësuesit zyrtar si provë e marrjes së licencës prej të licencuarit;
- f) zona e shërbimit;
- g) adresa e zyrës qendrore të të licencuarit;
- h) përshkrimi i aktivitetit i cili është objekt i licencës së lëshuar;
- i) kohëzgjatja e vlefshmërisë së licencës;
- j) moszbatim i vendimeve të ERE-s për tarifat.

Neni 18

Informimi i publikut

1. Regjistri i licencave është i disponueshëm për publikun gjatë orarit zyrtar të punës.

2. Mbështetur në kërkesën e argumentuar të aplikantit, ERE mund të vendosë që pjesë të informacionit përbërës të aplikimit, dokumenteve të tij mbështetëse apo shoqëruese, ose në vetë licencën janë me natyrë të ndjeshme komerciale dhe nuk duhet të ekspozohen. I gjithë informacioni i klasifikuar si i tillë do të trajtohet si konfidencial dhe do të jetë i mbrojtur prej ekspozimit, dhe do të trajtohet vetëm sipas një vendimi të ERE-s, i marrë në përputhje me legjislacionin në fuqi.

3. Informacioni konfidencial nuk do të bëhet i disponueshëm për publikun nëse publikimi i tij mundet të sjellë dëme ekonomike.

KREU VI DISPOZITA TË

FUNDIT Neni 19

Amendimi i rregullores

Kjo rregullore mund të amendohet me vendim të bordit të ERE-s.

Neni 20

Hyrja në fuqi

Kjo rregullore hyn në fuqi pas botimit në Fletoren Zyrtare.

ANEKSI A

PAGESA E REGJISTRIMIT DHE PROCEDIMIT TË NJË APLIKIMI

AKTIVITETI	Licencim	Modifikim	Rinovim	Transferim licence
Operim në impiantet e GNL-së	1 000 000 lekë	100 000 lekë	100 000 lekë	100 000 lekë
Shpërndarje të gazit natyror	1 000 000 lekë	100 000 lekë	100 000 lekë	100 000 lekë
Furnizim të gazit natyror	1 000 000 lekë	100 000 lekë	100 000 lekë	100 000 lekë

Funksionimin e operatorit të tregut të gazit natyror	1 000 000 lekë	100 000 lekë	100 000 lekë	100 000 lekë
Operim në hapësirat e depozitimit të gazit natyror	1 000 000 lekë	100 000 lekë	100 000 lekë	100 000 lekë
Tregtim të gazit natyror	40 000 lekë	30 000 lekë	30 000 lekë	30 000 lekë